

佛说睽子经 1 卷

No. 175

◎佛说睽子经

乞伏秦三藏法师释圣坚译

闻如是：

一时，佛在毘罗勒国，与千二百五十比丘，及众菩萨、国王、大臣、长者、居士、清信、士女不可称计，一时来会。

佛告诸比丘：「皆悉寂静定意听！我念前世，初得菩萨道时，戒行普慈，精进一心，修集智慧、善权方便，功德累积不可称记，诸天龙、鬼神、帝王、人民无能行者。」

阿难闻佛言，更正衣服，长跪叉手，白佛言：「愿欲所闻。」

佛告阿难：「乃往过去无数世时，有菩萨名曰一切妙行，慈仁惠施，救济群生，常行四等心，度世危难，育养苦人。在兜率天上教授天人，常以昼夜各三时定意，思惟三界，照观十方天下、人民善恶之道。知有父子，相养父母，奉事三尊，恭顺师长修诸功德者，常以天眼遍观五道。

「时，有迦夷国，中有一长者孤无儿子，夫妇两目皆盲，心愿入山求无上慧，修清净志，信乐空闲。菩萨念言：『此人发意欲学妙道，而两目皆盲，目无所覩，若入山中或堕沟坑，或逢毒虫所见危害；若我寿终为其作子，供养父母终其寿。』即便往生盲父母家，为其作子。父母欢喜爱之甚重，布发道意欲行入山，以生子故，便乐世闻。子年十岁号曰睽子，至孝仁慈，奉行十善：不杀、不盗、不淫、不欺、不饮酒、不妄言、不绮语、不嫉妬、信道不疑、昼夜精进，奉事父母如人事天，言常含笑不伤人意，行则应法不望倾邪，于是父母即大喜悦，无复忧愁。」

「睽年过十岁，睽自长跪，白父母言：『本发大意欲入深山，志求空寂无上之道，岂以子故而绝本愿。人居世间无常百变，命非金石对至无期，愿如本意宜本先志，自随父母俱共入山，侍养之宜不失时节。』父母报睽子言：『孝顺天自知之，不违本誓，便当入山。』睽即以家中所有之物，皆施国中诸贫穷者，便与父母俱共入山。

「睽子至山中，以柴草为父母作屋，施置床褥，不寒不热恒得其宜。适入山一年众果丰美，食之香甜，泉水涌出清而且凉；池中莲华五色精明，梅檀杂香，树木丰茂，香倍于常。风雨以时，不寒不热，树叶相接，以障雨露，荫覆日光其下常凉。飞鸟翔集，皆作伎乐之音，以娱乐盲父母；师子、熊罴、虎狼、毒兽，皆自慈心相向，无惊害之心，皆饮水、噉果无复惊怖之心，麋鹿、众鸟皆来附近，与睽音声相和，以娱乐盲父母。睽至孝仁慈无有过，蹈地常恐地痛，天神、山神皆作人形，昼夜慰劳三道人，一心定意无复忧愁。

「睽常与父母取百种果蔬以食父母，父母时渴欲饮，睽着鹿皮衣提瓶行取水，麋鹿、飞鸟亦复往饮，不相畏难。时，迦夷国王入山射猎，王见水边有麋鹿、飞鸟，引弓射之，箭误中睽。睽被毒箭甚痛，便大呼言：『谁持一毒箭，射杀三道人？』王闻人声，下马往到睽前，睽谓王言：『象坐牙死，犀坐角死，翠坐毛死，麋鹿坐皮死，今我死无牙、无角、无皮肉、不可噉，今有何罪横见射杀？』王言：『卿是何人？被鹿皮之衣与禽兽无异。』睽言：『我是王国中人，与盲父母俱来学道二十余年，未曾为虎狼毒虫所害，今便为王箭所射杀之。』

「当尔之时，山中大风暴起，吹折树木，飞鸟、禽兽、师子、熊罴、虎狼、毒兽皆[口*罍]呼动一山中；日无精光，流泉为竭，众花萎死，雷电动地。时，盲父母即自惊起曰：『是何变异？睽行取水经久不还，将无为毒虫之所害耶？禽兽悲鸣，音声号呼不如常时，风起四面树木摧折，必有灾异。』王时怖惧大自悔责：『我本射鹿，箭误伤中射杀道人，其罪甚重，坐贪少肉而受重殃，我今以一国财宝、宫殿、妓女、丘郭、城邑，以救子命。』

「时，王便前以手拔睽胸箭，箭深不可得出，飞鸟禽兽四面云集，悲鸣呼唤动一山中。王益怖惶，支节皆动，睽言：『非王之过！我自宿罪所致，我不惜身命，但怜我盲父母，年既衰老，目无所见，一旦无我，亦当终歿，以此懊恼酷毒耳。』当尔之时，诸天、龙神皆为肃动。王便重言：『我宁入泥犁中，百劫受罪，使睽身活。』长跪向睽悔过：『若睽命终，我当不复还国，

便住山中，供养卿盲父母，如卿在时，勿得为念，天龙、鬼神皆当证知，我不负此誓。』

「睽闻王此誓：『虽被毒箭，心喜意悦，虽死不恨，以我父母累王供养，王当罪灭，得福无量。』王言：『卿语我父母处，及子未绝吾欲知之。』睽即指示：『从此步径去是不远，自当见草屋，父母在其中止。王徐徐往，勿令我父母惊动怖惶，以善方便解语其意，王当为我上白父母。我无常今至，当就后世。我不惜身命，但怜我盲父母年以衰老，目无所见，一旦无我无所依仰，以此懊恼自酷毒耳。我死自分宿罪所致，无可得脱，今自忏悔，从无数劫有身以来，所行众恶，于此罪灭，愿与父母世世相值，不相远离，当令父母终保年寿，勿有忧患，天龙、鬼神常随护助，灾害消灭，所欲应意，无为自然。』

「王将数人诣父母所，王去之后，睽奄死矣。百鸟、禽兽四面云集，皆大号呼，遶睽尸，上舐是胸血。盲父母闻此音声，益怖彷徨而行。王行使疾，触动草木，肃肃有声，父母惊言：『此是何人？非我子行。』王言：『我是迦夷国王，闻盲道人在山学道，故来供养。』盲父母言：『枉屈大王来相慰劳，远临草野，王当疲极体安隐不？宫殿夫人、太子、官属皆安善不？风雨和调五谷丰不？邻国人民不相侵害耶？』王答道人：『得蒙尊恩，常自平安。』又更问讯：『在此山中劳大勤苦，树木之间，甚难为止，自安隐不？』盲父母言：『蒙大王恩，常自安隐，我有孝子，名字曰睽，常取果蓏泉水无乏；我有草席，王可就坐，果蓏可食。睽行取水，正尔来还。』

「王闻盲父母言，又大伤心，涕泣其言：『我罪实重，入山射猎，遥见水边有诸群鹿，引弓射之，箭误中睽；道人子睽已被毒箭，其痛甚酷，今故自来语道人耳。』父母闻之，举身自扑，如太山崩地为大动，号哭仰天，自陈诉言：『我子睽者，天下至孝，无有能过，蹈地常恐地痛，有何罪故而射杀之？向者，大风卒起，吹折树木，百鸟悲鸣，皆大号呼动一山中。我在山中二十余年，未曾有此灾异之变，而我子睽取水不还，恐当有故，诸神皆惊，肃肃而动。』母便涕哭，不肯复止，父言：『且止！人生世间，无有不死？无常对至，不可得却。』但问王：『睽为射何许，今为死活？』王以睽语向父母说，其盲父母闻王此语，又大感绝：『一旦无子，俱亦当死。大王！今者牵我二人往子尸上。』

「王即牵盲父母往到尸上，父抱其头，母抱两脚着与膝上，各以两手扞模睽箭，仰天呼言：『诸天、龙神、山神、树神，我子睽者，天下至孝，是诸天龙神所知。我年已老，目无所见，身代子死，睽活不恨。』于是，父母俱共誓言：『若睽至孝天地所知，箭当拔出，毒痛当除睽应更生。』」

「于是，第二忉利天帝座即为动，以眼见此二盲道人抱子号呼，乃闻第四兜率天上，释梵四王从天上来，如人屈伸之顷，来住睽前，以神妙药灌睽口中，药入睽口，箭拔毒出，更生如故。父母闻睽以死已生，两目皆开，飞鸟、走兽皆大欢乐之音，风息云消日为重光，流泉涌出清而且凉，池中莲华五色精明，栴檀杂香，树木光荣香倍于常。时王欢喜不能自胜，礼天帝释，还礼父母及子睽者：『愿以一国所有财宝，俱上道人自相供养，令我罪灭永无有余。』睽语王言：『欲兴福者，王但还国，安慰人民，当令奉戒；王勿射猎，横杀无辜，身不安隐，寿终当入泥犁之中。人居世间恩爱暂有，别离长久不得常在，王宿有福今得为王，莫憍自在，以自在故，造无量恶，后入恶道，悔之何益。』王答：『如教。』随王猎者，见睽死已，得天神药死而更生，父母眼开神变如是，悉奉五戒、修行十善，死得生天，无入恶道。」

佛告阿难：「诸来会者！宿命睽者，吾身是也；盲父者，闍头檀王是；盲母者，今王夫人摩耶是也；迦夷国王者，阿难是；天帝释者，弥勒佛是。」

佛告阿难：「吾前世，为子仁孝、为君慈育、为民奉敬，自致得成为三界尊。」

佛说经已，时诸菩萨、比丘、比丘尼、优婆塞、优婆夷莫不欢喜，作礼而去。

佛说睽子经

【经文信息】大正藏第 03 册 No. 0175b 佛说睽子经

【版本记录】CBETA 电子佛典 Rev. 1.11 (Big5), 完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，北美某大德提供，CBETA 自行扫描辨识，Jasmine 提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

